

VLA, Urk. 8070
12.3.1448

Ich Abrecht Edelherr sesshaft ze Torrenbüren tun kunt und vergich aller mengklich (Jedermann) mit verkunt Diss offenen Brieffs allen den die In ansechent oder hörent lesen von sölicher zuspruch wegen so Ich denn maint zu haben zu dem fromen und vesten Junkher Merken von Emptz von des wingarten wegen genant der abschlag gelegen by dem obern Dorff stost ainhalb an Junkher Michels von Emptz sins bruders abschlager obnan an die gassen und an thoman schmids gut ainhalb an Jäken ulrichen und an Josen bagolters gut undan an ulrichen schmitters und an hansen türings und an haini maygkers güter als Ich denn maint wie das miner muter haim- stür zu ainem erschatz daran komen und geben wär sol mengklich zu wissen sin das mir der vorgeant Junkher Märk von Emptz für alle min zuspruch anvordrung und grechtekait so Ich darzu ye gehept hän oder noch gewonnen hett also bar geben und bezalt hät fünff Rinsch guldin die an miner redlichen nutz und fromme kommen und bawent sind nach miner notdurfft Dar umb sollen noch wellen weder Ich noch dehain mine Erben zu dem vorgeantem Junkher Märken noch zu sinen erben von des obgeschribenen guts wegen Dehain ansbach nümer me haben noch Sy dar umb bekümben weder mit gaistlicher noch mit weltlicher gricht noch än gricht inkainen wegen wan Ich mich für mich und mine Erben und für mengklich von unser wegen gegen Im und sinen erben gantz und gar verzygen hän aller der recht vordrung und anspräch kuntschafft und geweir so wir darzu gehept haben oder noch gewonnen hetten Und des zu urkund der warhait und stäter vester sicherhait so han Ich vorgeanter Abrecht edelherr mit Ernst erbetten den fromen wysinen Oschwalten frygen zu den Zyten landsamman zu torrenbüren das er sin aigen Insigel offentlich an disen brieff gehenkt hät doch Im und sinen erben one schaden Der geben ist uff Sant gregorien tag do man zalt von Cristus geburt tusent vier hundert und In dem achtundvierzigosten Jar.